

四庫全書

子部

欽定四庫全書

子部

冊府元龜卷四百

十八至  
二十一

詳校官中書臣羅錦森

侍讀臣孫球覆勘

總校官庶吉士臣何思鈞

校對官中書臣金光悌

謄錄監生臣陳秉寧

謄錄監生臣王頌修

欽定四庫全書

冊府元龜卷四百十八

宋 王欽若等 撰

將帥部

嚴整

古之論將者既兼有智信仁勇而後加之以嚴其故何哉蓋夫推轂受命成師以出非威克則失政非衆整則喪列故善用兵者未嘗不以嚴整而制勝焉乃有正身以表率齊衆以進退出令必信行罰必當紀律素足恩

威靡瀆戰或不利而軍無亂行居常戒嚴而出必致捷  
以至長驅敵境路不拾遺克平城壘市靡改肆蓋武之  
有七德其戢兵禁暴之為急矣

陳成子齊大夫也帥師救鄭及留舒違穀七里穀人不

口言其整也留舒  
夫齊地違去也

漢周亞夫為河內太守文帝六年匈奴大入邊以宗正  
劉禮為將軍軍霸上祝茲侯徐厲為將軍軍棘門又以  
亞夫為將軍軍細柳以備胡帝自勞軍至霸上及棘門

軍直馳入將以下騎出入送迎已而之細柳軍軍士吏

被甲銳兵刃彀弓弩持滿

救張也

天子先驅至不得入

先驅

導駕者也

先驅曰天子且至軍門都尉曰軍中聞將軍之令

不聞天子之詔有頃上至又不得入於是帝使使持節

詔將軍曰吾欲勞軍亞夫乃傳言開壁門壁門士請車

騎曰將軍約軍中不得馳驅于是天子乃按轡徐行至

中營將軍亞夫揖曰介冑之士不拜請以軍禮見

禮介者不

拜天子為動改容式車

古者立乘凡言式車者謂俛身  
撫式以禮敬人式車前橫木者

也使人稱謝皇帝敬勞將軍成禮而去既出軍門羣臣皆驚帝曰嗟乎此真將軍矣鄉者霸上棘門如兒戲耳其將固可襲而虜也至于亞夫可得而犯耶稱善者久之月餘三軍皆罷迺拜亞夫為中尉

程不識為長樂衛尉武帝時以邊太守將屯正部曲行伍營陳擊刁斗吏計治軍簿虜不得犯

後漢鄧禹為大司徒征關中是時三輔連覆敗赤眉所過殘賊百姓不知所歸聞禹乘勝獨尅而師行有紀

綱紀

也言有條貫  
而不下失  
皆望風相攜負以迎軍降者以千數

鈔期重於信義自為將有所降下未嘗虜掠

陳俊為琅邪太守行大將軍事得專征青徐俊撫貧弱  
表有義檢制軍吏不得與郡縣相干百姓歌之

岑彭為征南大將軍與蓋延耿弇圍隗囂於西城彭壅  
谷水灌西城城未沒丈餘囂將巡行周宗將蜀兵救到  
囂得出還冀漢軍食盡燒輜重引兵下隴延弇亦相隨  
而退囂出兵尾擊諸營彭殿為後拒

尾謂尋其後而擊之凡軍在前曰啓

在後曰殿東觀記曰彭東入弘農界百姓持酒肉迎軍曰蒙將軍為後拒全子弟得生還也故諸將

能全師東歸又與諸將伐公孫述彭首破荆門長驅武陽持軍整齊秋毫無犯

朱祐為建義大將軍將兵率衆多受降以克定城邑為本不存首級之功禁制士卒不得虜掠百姓軍人樂放縱多以此怨之

馮異為掾史光武使異別收河間兵還拜偏將軍從破王郎封應侯異為人謙退不伐行與諸將相逢輒引車



避道進止皆可表識軍中號為整齊

高順為呂布督將清白有威嚴少言辭將眾整齊每戰必尅

魏于禁為平虜校尉從至宛陵張繡與角復叛太祖與戰不利軍敗還舞陰是時軍亂各間行求太祖禁獨勒所將數百人且戰且引雖有死傷不相離虜追稍緩禁徐整行隊鳴鼓而還未至太祖所道見十餘人被鎗裸走禁問其故曰為青州兵所劫初黃巾降號青州兵太



祖寬之故敢因緣為畧禁怒令其衆曰青州兵同屬曹公而還為賊乎乃討之數之以罪青州兵遽走詣太祖自訴禁既至先立營壘未謁太祖或謂禁青州兵已訴公矣宜促詣公辨之禁曰今賊在後追至無時不先為備何以待敵且公聰明譖訴何緣徐鑿塹安營訖乃入謁且陳其狀太祖悅謂禁曰消水之難吾其急也將軍在亂能整討暴堅壘有不可動之節雖古名將何以加之時于禁與張遼樂進張郃徐晃俱為名將太祖每征

伐咸遞行為軍鋒還為後拒而禁持軍嚴整

徐晃為平寇將軍既破關侯時諸將皆集太祖按行諸營士卒咸離陣觀而晃軍營整齊將士駐陣不動太祖歎曰徐將軍可謂有周亞夫之風矣

曹仁為征南將軍仁少不修行檢及長為將嚴整奉法令常置科於左右案

裴潛為兗州刺史太祖次摩陂歎其軍陣齊整特加賞賜

蜀諸葛亮悉大衆據武功五丈原分兵屯田為久駐之  
基耕者雜於渭濱居民之間而百姓安堵軍無私焉

趙雲為偏將軍從先主鎮荊州先主入益州雲領留營  
司馬此時孫夫人以權妹驕豪多將吳吏兵縱橫不法  
先主以雲嚴重必能整齊特任掌內事權聞先主西征  
大遣舟船迎妹而夫人內欲將後主還吳雲與張飛勒  
兵截江乃得後主還雲後與鄧芝馬謖將兵拒魏軍謖  
敗於街亭雲芝敗於箕谷諸葛亮曰街亭軍退兵將不

復相錄箕谷軍退兵將初不相失何故芝荅曰雲身自斷後軍資什物畧無所棄兵將無緣相失

王平為裨將軍屬馬謖先鋒謖大敗於街亭衆盡星散惟平所領千人鳴鼓自持魏將張郃疑其伏兵不往逼也於是平徐徐收合諸營遺卒率將士而還丞相亮既誅馬謖等及奪將軍黃襲等兵平特見崇顯

吳魯肅為人方嚴治軍整頓禁令必行肅遺腹子淑永安中為武昌督假節遷夏口督所在嚴整有方幹

賀齊為將黃武初魏使曹休來伐齊以道遠後至因住  
新市為拒會洞口諸軍遭風流溺所亡中分將士失色  
賴齊未濟偏軍獨全諸將倚以為勢齊性奢綺尤好軍  
事兵甲器械極為精好所乘船雕刻丹鏤青蓋絳檐干  
櫓戈矛葩爪文畫弓弩矢箭咸取上材蒙衝鬪艦之屬  
望之若山休等憚之遂引軍還遷後將軍假節為徐州  
牧

步騭為驃騎將軍領冀州牧都督西陵十二年鄰敵敬

其威信惟寬弘得衆喜怒不形於聲色而外內肅然  
潘璋為右將軍為人麤猛禁令肅然好立功名所領兵  
馬不過數千而其所在常如萬人征伐每止頓立軍市  
他軍所無皆仰取足

朱然為左司馬右軍師雖世無事每朝夕嚴鼓兵在營  
者咸行裝就隊以此玩敵使不知所備故出恒有功  
孫吳為揚武中郎將領江夏太守黃武中大帝攻石陽  
吳以地主使所部將軍鮮于丹帥五千人先斷淮道自

帥吳碩張梁五千人為軍前鋒降高城得三將大軍引  
還帝詔使在前住駕過其軍見與軍隊整齊帝歎曰初  
吾憂其遲鈍今治軍諸將少能及者吾無憂矣

賀景為滅賊校尉禦衆嚴而有恩兵器精飾為當時冠  
絕

晉薛翊為將軍持節南征軍容甚盛

劉毅為冠軍將軍持節兗州節度使號令嚴整行經墟  
邑百姓安悅



前秦王猛為輔國將軍率諸軍討慕容暉軍禁嚴明師無私犯猛未至鄴劫盜公行及猛之至遠近怡然燕人安之

後秦姚碩德為鎮西將軍率兵伐呂隆法令齊整秋亳無犯祭先賢禮儒哲西土悅之

宋蒯恩為龍驤將軍高祖伐魯宗之恩與建威將軍徐達之前進達之敗沒恩陣於堤下宗之子軌乘勝擊恩矢下如雨呼聲震地恩整厲將士置陣堅嚴軌屢衝之

不動知不可攻乃退高祖善其能將

王鎮惡隨高祖北伐既入長安姚泓率妻子歸降城內  
夷晉六萬餘戶鎮惡宣揚國恩撫慰初附號令嚴肅百  
姓安堵

劉勔為寧朔將軍會豫州刺史殷琰反假勔輔國將軍  
討之及琰開門請降勔約令三軍不得妄動城內士民  
秋毫無所失百姓感悅咸曰來蘇

沈攸之為冠軍將軍雍州刺史破薛常寶劉胡于赭淝

濃湖賊軍委棄資財珍貨殷積諸軍各競收斂以強弱  
為多少惟攸之張興世約勒所部不犯秋毫諸將以此  
多之

蕭惠開為桂陽王征北長史南東海太守惠開先與會  
稽太守蔡興宗名位畧同又結情款自以負釁摧屈慮  
興宗不能諳已戒勒部下曰蔡會稽部伍若借問慎不  
得答惠開素嚴部下莫敢違犯興宗見惠開舟力甚盛  
不知為誰遣人歷船訊惠開有舫十餘事幹力二三百

人皆低頭直去無一人答者

梁柳慶遠為征東長史高祖義兵起雍州慶遠從軍下  
身先士卒高祖行營壘見慶遠頓舍嚴整每歎曰人人  
若是吾又何憂

楊公則為左衛將軍高祖起義下郢州定江州號令嚴  
明秋毫不犯所在莫不賴焉及平建康城內出者或被  
剝奪公則親率麾下陣東掖門衛送公卿士庶故出  
者多繇公則營焉

裴邃為宣義將軍鎮合肥居身方正有威重將吏憚之  
少敢犯法

張弘策為輔國將軍從高祖義師平建康弘策與呂僧  
珍先入清宮禁封驗府庫時城內珍寶委積弘策中勒  
部曲秋毫無犯

後魏樂平王丕為車騎大將軍督河西高平諸軍南討  
秦王楊難當軍至雒陽禁令齊肅所過無私百姓爭致  
牛酒

安定王休領大司馬孝文車駕南伐親行諸軍遇休以  
三盜入徇於六軍將斬之有詔赦之休執曰陛下將遠  
清衡霍故親御六師跋涉野次軍行始再已有姦竊如  
其不斬何以息盜請必行刑以肅姦慝詔曰大司馬執  
憲誠應如是但因緣會朕聞王者之體亦時有非常之  
澤雖違軍法可特原之休乃奉詔孝文謂司徒馮誕曰  
大司馬嚴而秉法諸軍不可不慎於是六軍肅然  
來大千為內幢將典宿衛禁旅大千用法嚴明上下齊

肅

叔孫建為平原鎮大將封丹陽王加征南大將軍都督  
冀青徐濟四州軍事建沈敏多智東征西伐常為謀主  
治軍清整號令嚴明

宇文福為武衛將軍從孝文征南陽與右衛將軍楊播  
為前軍至鄧城福選兵簡將為攻圍之勢帝望福兵軍  
法齊整將士閑習大被褒歎

元英為南安將軍領護西戎校尉孝文南伐為梁漢別

道都將圍南鄭禁止三軍一無所犯遠近皆供租運

劉潔以數從征討有功進爵會稽公與樂平王丕督諸軍取上邽軍至啓陽百姓爭致牛酒潔至上邽諸將咸欲斬其豪帥以示王威潔不聽撫慰秦隴秋毫無犯人皆安業

源子恭為尚書主客郎中攝南主客事時河州羌却鐵忽反殺害長吏詔子恭持節為行臺率諸將討之子恭嚴勒州郡及諸軍不犯民一物



北齊斛律羨為幽安平南北營東燕六州都督突厥衆  
十餘萬來寇州境羨總率諸將禦之突厥望見軍威甚  
整遂不敢戰即遣使求款附

後周李賢為大將軍魏帝西遷太祖令賢率騎兵迎衛  
時山東之衆多欲逃歸帝乃令賢以精騎三百為殿衆  
皆憚之莫敢亡叛

權景宣為大都督豫州刺史鎮樂口時東魏來寇潁川  
陷後太祖以樂口等諸城道路阻截悉令拔還襄州刺

史范秀以狼狽得罪景宣號令嚴明戎旅整肅所部全  
濟獨被優賞

齊王憲為大司馬遷上柱國武帝東伐為前鋒齊人夙  
聞威聲無不憚其勇畧及并州之捷長驅敵境芻牧不  
擾兵無私焉

尉遲迴為大將軍平蜀蜀主蕭紀子宜都王肅與其文  
武官屬詣軍門請見迴以禮接之其吏人合營等各令  
復業惟收僮隸及儲積以賞將士號令嚴肅軍無私焉

扶猛為汝州刺史從衛公直援陳將華皎時大軍不利  
惟猛所部獨全

隋李雄仕周為驃騎大將軍遷小賓部從達奚武與齊  
人戰于芒山諸軍大敗雄所領獨全

賀若弼為吳郡總管開皇九年大舉伐陳弼襲陳南徐  
州拔之執其刺史黃恪軍令嚴肅秋毫不犯有軍士於  
民間酤酒者弼立斬之

楊素為靈州道行軍總管討突厥大破之素馭戎嚴整

有犯軍令者立斬之無所寬貸由是戰無不勝稱為名將

宇文忻為右領軍大將軍馭戎整齊

閻毗為車騎宿衛東宮高祖嘗遣高頰大閱于龍臺澤諸軍部伍多不齊整惟毗一軍法制肅然頰言之于帝特蒙賜帛

劉方為交州道總管法令嚴肅軍容齊整有犯禁者造次斬之

薛世雄為右監門郎將從煬帝征吐谷渾進位通議大夫世雄性廉謹凡所行軍破敵之處秋毫無犯帝繇是嘉之

衛玄為刑部尚書遼東之役檢校右禦衛大將軍率師出增地道時諸軍多不利玄獨全眾而退

堯君素為鷹揚郎將大業之末盜賊蜂起人多流亡君素所部獨全

唐闕稜為越州都督時杜伏威據有江淮之地其部皆

出自羣賊類多放縱有相侵奪者稜必殺之雖親故無捨令行禁止路不拾遺

李靖武德中為行軍總管征荊州降蕭銑入據其城號令嚴肅軍無私焉

獨孤開遠貞觀初詔典屯兵突厥初降諸蕃遠至太宗較獵於昆明池以示威武令開遠總統左廂六衛兵馬軍令嚴肅太宗大悅賜雜綵二百段後出為蒲州刺史薛訥為左衛大將軍玄宗即位于新豐講武以訥為左

軍節度時元帥與禮官得罪諸部領亦失序惟訥及解  
琬之軍中不動令輕騎詔訥至軍門皆不得入禮畢帝  
甚加慰勞

王思禮為河東節度使善於支計拙於征伐然用法嚴  
整士卒不敢犯時議稱之

長孫全緒為右羽林大將軍吐蕃犯長安既平中書令  
郭子儀率六軍將士自商州還師長安命全緒為先鋒  
全緒既進隊伍嚴整京城士庶迎拜歡呼

卷四十八  
令狐彰為滑亳等六州節度時犬戎犯邊徵兵防狄彰遣屬吏部統營伍自滑至京之西郊尚一千餘里甲士三千人率自齋糧所過州縣路次供億皆辭而不受所經閭里不犯秋毫識者稱之

尚可孤為神策大將軍魚朝恩之統禁軍愛其勇力甚委遇之俾為養子奏改姓魚氏名智德以禁兵三千鎮于扶風縣後徙武功可孤在扶風武功凡十餘年士伍整肅郡縣安之興元初與李晟同收京城賊平之後營



于白華亭統衆公平號令嚴整時人稱焉李晟甚親重之

段秀實為涇州刺史邠寧節度白孝德奏秀實試太常卿支度營田二副使大軍西遷所過掠奪又以邠境乏食難於饋運乃請軍於奉天是時公廩亦竭縣吏憂恐多逃匿郡行剽盜孝德不能禁秀實私曰使我為軍候當不如是軍司馬言之遂以秀實為都虞候權知奉天行營事號令嚴一軍府安泰代宗聞而嗟賞久之兵還

于邠寧復為都虞候

張孝忠為高陽軍使統易州田承嗣之寇冀州成德軍節度李寶臣使以精騎四千禦之承嗣覩其嚴肅歎曰張阿勞在焉冀州未易圖也乃焚營宵遁阿勞孝忠小字也

李懷光為朔方節度郭子儀軍都虞候性清勤嚴猛而敢誅殺雖親戚犯法皆不撓避子儀性寬厚不親軍事紀綱任懷光軍中尤畏之亦稱為理

李觀為右龍武大將軍涇帥叛觀時上直領衛兵千餘人扈從奉天詔都巡警訓練諸軍戍帥三數日間加召五千餘兵列之通衢整肅鞀鼓城內因之增氣

辛雲京為太原節度使質性沈毅部下有犯令者不貸絲毫其賞功効亦如之故三軍整肅

李晟興元初為神策行營節度使與李懷光同討朱泚晟軍舍於朔方軍之北每晟軍與懷光軍同至城下懷光軍輒虜掠驅牛馬百姓苦之晟軍無所侵犯懷光軍

惡其獨善乃分所虜獲與之晟軍不敢受晟又收復京城遣京兆尹李齊運告諭於衆百姓安堵秋毫無犯初勒兵屯於含元殿前舍於右金吾仗號令三軍曰晟不佞上憑睿算次順人心今得尅滅兇渠肅清天禁皆三軍之力也長安士庶久陷賊庭若小有震驚則非伐罪弔人之義晟與公等各有家累離別數年今已成事相見非晚五日內不得輒通家信違命者斬

嗣曹王皋為相州節度市迴紇馬以益騎兵每大畋獵

以教士卒軍令嚴肅路無拾遺

高宗文元和初為左神策行營節度使統兵討劉闢于西川軍至興元軍中有折逆旅之七箸者斬之以狗王師既入成都介士屯于大遠軍令嚴肅珍貨山積市井不移無秋毫之犯

李愿為夏州節度使威令簡肅甚得綏懷之術客有亡馬者投狀告愿愿以狀榜于路懸金以購之不二日所亡馬并一良馬並繫於榜下而置書一緘曰馬逸及郡

不時告罪當死敢以良馬一贖罪并亡馬謹納於路愿  
付客亡馬而解良馬以放之境內嚴肅多如此類

李抱玉為山南西道副元帥鎮鳳翔十餘年雖無破虜  
之功而禁暴安人頗為時所稱

劉潼盧龍軍節度使怱之次子怱卒子濟代任濟表為  
瀛州刺史潼性輕財愛士得人之死力濟疑忌頗甚人  
多間之因召潼不至發兵攻之潼嬰城自守以事上聞  
城數月不拔濟令引滹沱水灌之城中益急會有詔許

漣朝京師漣乃拔瀛州軍士及男女萬餘口歷恒魏數軍直趨京師人無離叛者漣號令嚴肅所過芻蕘無所犯其諸軍雖甚惡之卒不能阻敗

李愬為唐鄧節度使平蔡州初愬父晟克復京城市不改肆而愬平淮蔡復踵其美

梁牛存節為邕後都指揮使唐乾寧四年秋大舉以伐淮南至濠州東聞前軍失利於青口諸軍退至淝河無復隊伍存節尾其後與諸軍釋騎步鬪諸軍退得濟收

合所部并敗兵共八千餘人至於淮浚時不食已四日矣存節訓勵部分以禦追寇得旋歸

黃文靖初為太祖牙職遷諸軍指揮使唐大順中佐葛從周送朱崇節入潞會晉軍十餘萬附外垣寨焉文靖慮諸軍難守乃與葛從周啓闔出師文靖為殿命矢刃皆外向持重而還晉人不敢逼

後唐王瓚初仕梁諸衛大將軍貞明五年代賀瓌統軍駐于河上時李存審築壘於德勝渡秋八月瓚率汴軍



五萬自黎陽渡河將掩擊魏州明宗出師拒之瓚至頓丘而旋於楊村夾河築壘架浮航自滑餽運相繼瓚嚴於軍法令行禁止

李存璋為河東馬步都虞候初武皇稍寵軍士蕃部人多干擾塵市肆其侵奪法司不能禁莊宗初嗣位銳於求理存璋得行其志抑強扶弱誅其豪首朞月之間紀綱大振羣盜盜務耕稼姦宄息倖門當時稱其材幹

李存進為沁州刺史天祐十三年從定魏州授天雄軍

都部署時鄴初歸我人情離貳銀鎗效節諸軍強桀難制訛言竊議搖扇羣情存進沉厚果斷犯令者梟首於市強右豪奪暴掠人物者必磔裂暴屍於路鄴人視之無不惕息由是軍民靡然從化

郭崇韜為樞密使從魏王平蜀大軍入西川城戒諸軍剽掠法令嚴峻軍士強估一錢必論之法市不改肆晉史翰為義成軍節度使性剛毅有謀畧御軍嚴整漢史弘肇為侍衛使嚴毅寡言部轄軍衆有過無捨兵

士所至秋毫不犯部下有指揮使嘗因指使少不從命  
弘肇立搃殺之將吏股慄至平定兩京無敢干忤

周安審琦為中書令鎮襄江僅餘一紀嚴明御下政不  
暴俗而南邦之民甚懷其惠

韓令坤為侍御馬軍都指揮使顯德三年領兵襲揚州  
揚州將吏聞王師至開門以迎之令坤整衆而入市不  
易肆人甚悅之

冊府元龜卷四百十八

欽定四庫全書

冊府元龜卷四百十九 宋 王欽若等 撰

將帥部

持重 以少擊衆

持重

蘇秦有言曰任大功不輕敵蓋兵者凶器將者人之司命雖軍師彊禦卒乘競勸未有輕易而能成功者焉是以楚衆輕佻樂書識其可追趙括易言馬服知其必敗

全軍保勝其惟持重乎自秦漢以還將之良者乃有深溝高壘以待敵人之勞安坐堅臥以制麾下之亂居常休士以養勇臨敵整衆而戒嚴故能進必克勝退無負衄斯所謂十全之舉節制之師與夫致之死地而後生投之亡地而後存微天幸圖拙速者異矣

秦王翦將兵六十萬人代李信擊荆荆聞王翦益軍而來乃悉國中兵以拒秦王翦至堅壁而守之不肯戰荆兵數出挑戰終不出王翦日休士洗沐而善飲食循撫之

親與士卒同食久之王翦使人問軍中戲乎對曰方投

石超距

漢書云甘延壽投石拔距絕於等倫張晏曰范蠡兵法飛石重二十斤為幾行三百步延壽有

力能以手投之拔距超距也

於是王翦曰士卒可用矣荆數挑戰而

秦不出乃引而東翦因舉兵追之令壯士擊大破荆軍

漢周亞夫為中尉吳楚反以太尉東擊吳楚會兵滎陽

吳方攻梁梁急請救亞夫引兵東北走昌邑深壁而守

梁王使使請亞夫亞夫守便宜不往梁上書言景帝帝

詔使救梁亞夫不奉詔堅壁不出而使輕騎兵弓高侯

等絕吳楚兵後食道吳楚兵乏糧飢欲退數挑戰終不出夜軍中驚內相攻擊擾亂至于帳下亞夫堅臥不起頃之復定吳奔壁東南陬亞夫使備西北已而其精兵果奔西北不得入吳楚既飢乃引兵去

韓安國字長孺梁成安人也事梁孝王為中大夫吳楚反時孝王使安國及張羽為將捍吳兵于東界張羽力戰安國持重以故吳不能過梁

趙充國為後將軍擊先零諸叛羌充國嘗以遠斥堠為



務行必為戰備止必堅營壁尤能持重愛士卒先計而  
後戰

後漢吳漢為大司馬建武四年冬率建威大將軍耿弇  
漢中將軍王常等擊富平獲索二賊於平原明年春賊  
率五萬餘人夜攻漢營軍中驚亂漢堅臥不動有頃乃定  
王霸為偏將軍建武四年與捕虜將軍馬武討周建于  
垂惠蘇茂來救建霸擊敗之霸武各歸營賊復聚挑戰  
堅臥不出方享士作倡樂茂雨射營中中霸前酒尊安

坐不動軍吏皆曰茂前日已破今易擊也霸曰不然蘇茂客兵遠來糧食不足故數挑戰以徼一切之勝今閉營休士所謂不戰而屈人之兵善之善者也茂建既不得戰乃引還營其夜建兄子誦反閉城拒之茂建遁去誦以城降

馬成建武四年拜揚武將軍督誅虜將軍劉隆等擊李憲進圍于舒令諸軍各深溝高壘憲數挑戰成堅壁不出守之歲餘至六年春城中食盡乃攻之遂屠舒斬李

憲追擊其黨與盡平江淮地

祭遵為征虜將軍建武八年從車駕上隴及隗囂破帝東歸令遵進屯隴下及公孫述遣兵救囂吳漢耿弇等悉奔還遵獨留不卻

馮異守征虜將軍行天水太守事時隗囂死子純猶總兵據冀諸將共攻冀不能拔欲且還休兵異固持不動常為衆軍先鋒

張奐為安定屬國都尉遷使匈奴中郎將時休屠各及

朔方烏桓並同反叛燒度遼將軍門引屯赤陁煙火相望兵衆大恐各欲亡去奐安坐帷中與弟子講誦自若軍士稍安乃潛誘烏桓陰與和通遂使斬屠各渠帥襲破其衆諸胡悉降

袁紹領冀州牧獻帝初平四年三月上巳大會兵徒於薄落津聞魏郡兵反與黑山賊于毒等數萬人共覆鄴城殺郡守坐中客家在鄴者皆憂怖失色或起而涕泣

紹容貌自若不改常度

獻帝春秋曰紹勸督引滿投壺言笑容貌自若

魏張遼為盪寇將軍時荊州未定遣遼屯長社臨發軍  
中有謀反者夜驚亂起火一軍盡擾遼謂左右曰勿動  
是不一營盡反必有造變者欲以動亂人耳乃令軍中  
其不反者安坐遼將親兵數十人中陣而立有頃定即  
得首謀者殺之

田豫為汝南太守加殄夷將軍吳人來寇豫往拒之賊  
即退諸軍夜驚云賊復來豫臥不起令衆敢動者斬有  
頃竟無賊

司馬孚為侍中吳將諸葛恪圍新城以孚督諸軍二十萬防禦之孚次于壽春遣毋丘儉文欽等進討諸將欲速擊之孚曰夫攻者借人之力以為功且當詐巧不可爭力也故稽留月餘乃進軍吳師望風而退

吳甘寧守夷陵手下有數百兵并所新得僅滿千人魏將曹仁令五六千人圍寧寧受攻累日敵設高樓雨射城中士衆皆懼惟寧談笑自若

朱然鎮江陵黃武六年大帝自率衆攻石陽及至旋師

潘璋斷後夜出錯亂敵追擊璋璋不能禁然即還住拒敵使前船得引極遠徐乃後發

全琮為將甚勇決當敵臨難奮不顧身及作督帥養威持重每御軍常任計策不營小利

朱異為揚武將軍赤烏十三年十月魏將文欽為叛以誘異大帝遣呂據就異以迎欽異等持重欽不敢進

晉周訪為豫章太守時荊州賊杜曾逐刺史王廙徑造沔口大為寇害威震江沔元帝命訪擊之訪有衆八千

進至沌陽曾等銳氣甚盛訪曰先人有奪人之心軍之善謀者也使將軍李恒督左甄許朝督右甄訪自領中軍高張旗幟曾果畏訪先攻左右甄曾勇冠三軍訪甚惡之自於陣後射雉以安衆心令其衆曰一甄敗鳴三鼓兩甄敗鳴六鼓趙盾領其父餘兵屬左甄力戰敗而復合盾馳馬告訪訪怒叱令更進盾號哭還戰自旦至申兩甄皆敗訪聞鼓音選精銳八百人自行酒飲之勅不得妄動聞鼓音乃進賊未至三十步訪親鳴鼓將士



皆騰躍奔赴曾遂大潰殺千餘人

宋蒯恩為龍驤將軍行參軍高祖伐魯宗之恩與建威將軍徐達之前進達之敗沒恩陳于隄下宗之子軌乘勝擊恩矢下如雨呼聲震地恩整厲將士置陣整嚴軌屢衝之不動知不可攻乃退高祖善其能將持重

巴陵王休若文帝子也會稽太守孔覲反遣尚書張永建威將軍沈懷明及休若董統諸軍討之覲所遣孫曇瓘等軍頓晉陵九里部陳甚盛懷明至奔牛所領寡弱

乃築壘自固張永至曲阿未知懷明安否百姓驚擾將帥咸勸退保破岡其日大寒風雪甚猛塘埭決壞衆無固心休若宣令敢有言退者斬衆少定乃築壘息甲尋得懷明書賊定未進軍主劉亮又至兵力轉加人情乃安

劉義欣為後將軍南兖州刺史元嘉七年到彥之率大衆入河義欣進彭城為衆軍齊援彥之退敗青齊騷擾將佐虜寇大至勸義欣委鎮還都義欣堅志不動遷鎮

壽陽

南齊蕭穎胄為冠軍將軍廬陵王後軍長史廣陵太守  
行南兖州府事是年虜揚聲當飲馬長江帝懼勅穎胄  
移居民入城百姓驚恐席捲欲南渡穎胄以賊勢尚遠  
不即施行虜亦尋退

梁楊公則為左衛將軍高祖義師東下至新林公則自  
越城移屯領軍府壘北樓與南掖門相對嘗見登樓望  
戰城中遙見麾蓋縱神鋒弩射之矢貫胡床左右皆失

色公則曰幾中吾脚談笑如初東昏夜選勇士攻公則  
柵軍中驚擾公則堅臥不起徐命擊之東昏軍乃退

蕭藻為益州刺史焦僧護作亂掩據郫繁衆有數萬藻  
年未弱冠肩輿行城賊流矢雨下從者舉楯以蔽藻命  
去之因是物情大安賊遂退去

韋叡為輔國將軍討合肥初肥水堰立使軍主王懷靜  
築城于岸守之魏攻陷懷靜城千餘人皆沒魏人乘勝  
至叡隄下其勢甚盛軍監潘靈祐勸叡退還巢湖諸將

又請走保三义。叡怒曰：寧有此邪？將軍死綏，有前無却。因令取繖扇麾幢樹之隄下，示無動志。叡素羸，每戰不常騎馬，以版輿自載，督厲衆軍。合肥既平，高祖詔班師去賊。既近，恐為所躡，叡悉遣輜重居前身，乘小輿殿後。魏人服叡威名，望之不敢逼全軍而還。

王珍國為游擊將軍，父憂去職。建武末，魏軍圍司州。明帝使徐州刺史裴叔業攻拔渦陽，以為聲援。起珍國為輔國將軍，率兵助焉。魏將楊大眼大衆奄至，叔業懼，棄

軍走珍國率其眾殿故不至大敗

王僧辯為鎮軍將軍司徒尚書令討湘州賊陸納賊敗  
步走歸保長沙驅逼居民入城拒守僧辯追躡乃命築  
壘圍之悉令諸軍廣建圍柵僧辯出坐隴上而自臨視  
賊望識僧辯知不設備賊黨吳藏李賢明等乃率銳卒  
千人開門掩出蒙楯並進徑趨僧辯時杜蒨杜龕並侍  
左右帶甲衛者止百餘人因與賊交戰賢明乘鎧馬從  
者十騎大呼衝突僧辯尚據胡床不為之動于是指揮

勇敢遂獲賢明因即斬之賊乃退

後魏李平為鎮北將軍討京兆王愉于冀州平進次經縣諸軍大集夜有蠻兵數千斫平前壘矢及平帳平堅臥不動俄而乃定

北齊爾朱渾元累有戰功遷太師善于御衆行軍用兵務在持重前後出征未嘗負敗

唐魏元忠為并州副元帥時突厥與吐蕃數犯塞元忠皆為大總管拒之元忠在軍惟持重自守竟無所克獲

然亦未嘗敗失

後唐李嗣昭守潞州嘗享諸將登城張樂為梁軍矢中其足嗣昭密拔之坐客不之覺酣飲如故以安士心

以少擊衆

軍志曰以一擊十莫善於阨以十擊百莫善於險以千擊萬莫善於阻用衆者務易用少者務阨也若乃勵敢死之士乘戰勝之威揀練卒伍服習器用冒利刃以不顧臨大敵而賈勇斯固制勝而必克遇戰而皆獲者焉



至於勢有彊弱技有長短蓋亦由夫將有勇怯而制有巧拙也及夫客主之勢懸絕格鬪之志奮勵士樂用命人百其勇又何嘗不收奇功哉然而常勝之家難與慮敵為將之道出於萬全故兵法有必勝之將無必勝之兵若狃挾以輕敵深入以邀幸雖曰拳勇亦所慎焉

漢黥布初為項籍將籍使布先涉河

涉謂無舟楫而渡也

擊軍數

有利籍乃悉引兵從之遂破秦軍降秦將章邯等楚兵常勝功冠諸侯諸侯兵皆以服屬楚者以布數以少敗

衆也

李廣為郎中令將四千騎出右北平行數百里匈奴將四萬騎圍廣廣為圜陣外向胡急擊之矢下如雨漢兵死者過半漢矢且盡廣乃令士持滿毋發而廣身自以

大黃射其裨將

大黃弩名亦曰黃弩

殺數人胡虜益解

李陵為騎都尉天漢二年將步卒五千至浚稽山與單于相值騎可三萬圍陵軍虜見漢軍少直前就營陵搏戰攻之

手對戰也

千弩俱發應弦而倒虜還走上山漢軍追

擊殺數千人單于大驚召左右地兵八萬餘騎攻陵陵

且戰且引南行數日抵山谷中

抵當也

單于在南山上使

其子將騎擊陵陵軍步鬪樹木間復殺數千人因發連

弩射單于

三十卷共一臂也  
秦音卷又去權切

單于下走是時陵軍益急

匈奴騎多戰一日數十合復傷殺虜二千餘人

陵與蘇  
武書曰

以五千之衆  
對十萬之軍

後漢馬防為城門校尉建初二年金城隴西保塞羌皆

反

羌東吾燒當之後也以其父滇  
吾降漢乃入居塞內故稱保塞

拜防行車騎將軍事

軍到莫而羌豪布橋等圍南部都尉于臨洮防欲救之  
臨洮道險車騎不得方駕防乃別使兩司馬將數百騎  
分為前後軍去臨洮十餘里明旦遂鼓譟而前羌虜驚  
走因追擊破之斬首虜四千餘人遂解臨洮圍

耿夔為車騎都尉永元三年車騎將軍竇憲出河西以  
夔為大將軍左校尉將精騎八百出居延塞直奔北單  
于庭于金微山斬闕氏名王已下五千餘級單于與數  
騎脫亡盡獲其匈奴珍寶財蓄去塞五千餘里而還

魏張遼為盪寇將軍與李典將七千餘人屯合肥吳孫  
權率十萬衆圍合肥遼夜募敢從之士得八百人明日  
自旦戰至日中吳人奪氣還修守備權守合肥十餘日  
乃引退遼率諸軍追擊幾復獲權太祖大壯遼拜征東  
將軍黃初中卒文帝追念遼典在合肥之功詔曰合肥  
之後遼典以步卒八百破賊十萬自古用兵未之有也  
使賊至今奪氣可謂國之爪牙矣其分遼典邑各百戶  
賜一子爵關內侯

吳徐盛為大帝別部司馬授兵五百人守柴桑長拒劉表將江夏太守黃祖祖子射嘗率數千人下攻盛盛時吏士不滿二百與相拒擊傷射吏卒千餘人已乃開門出戰大破之射遂絕迹不復為寇大帝以為校尉後為建武將軍魏將曹休出洞口盛與呂範全琮渡江拒守遭大風船人多喪盛收餘兵與休夾江休使兵將就船攻盛盛以少禦多敵不能克各引軍退

朱然為車騎將軍右護軍赤烏五年征柤中魏將蒲忠

胡質各將數千人忠要遮險隘圖斷然後質為忠繼援時然所督兵將先四出聞問不暇收合便將帳下見兵八百人逆掩忠戰不利質等皆退

晉王渾為征虜將軍假節領豫州刺史與吳接境吳將薛瑩魯淑衆號十萬淑向弋陽瑩向新息時州兵並放休息衆裁一旅浮淮潛濟出其不意瑩等不虞晉師之至渾擊破之遷為安東將軍

周處為御史中丞隸夏侯駿西征時賊屯梁山有衆七

萬而駿遣處以五千兵擊之自旦及暮斬首萬計

劉演為陽平太守石勒之亂演奔劉琨琨以為輔國將軍魏郡太守琨將討勒以演領勇士千人行北中郎將兗州刺史鎮廩丘斬王桑走趙固得衆七千人為勒所攻演拒戰勒退元帝拜為都督後將軍假節

謝玄為冠軍將軍領徐州刺史苻堅自率兵次于項城衆號百萬詔玄為前鋒都督拒之衆凡八萬玄與從弟輔國將軍琰西中郎將桓伊等以精銳八干涉淮水堅



衆奔潰死者不可勝計

王猛為苻堅將與鄧羌等將步騎六萬伐慕容暉既陷  
晉陽暉遣慕容評率衆四十萬救之陣於渭源猛羌與  
張蚝徐成等跨馬運矛馳入評軍出入數四傍若無人  
搴旗斬將殺傷甚衆戰及日中評衆大敗俘斬五萬有  
餘乘勝追擊又降斬十萬

宋臨川王道規隨高祖起義為振武將軍義興太守與  
晉將劉毅何無忌追桓玄遇玄于崢嶸洲道規等兵不

滿萬人而玄戰士數萬衆並憚之欲退還尋陽道規曰  
不可彼衆我寡強弱異勢今若畏懦不進必為所乘雖  
至尋陽豈能自固玄雖竊名雄豪內實畏怯加已經奔  
敗衆無固心決機兩陣將雄者克昔光武昆陽之戰曹  
操官渡之師皆以少制多所共聞也今雖才謝古人豈  
可先為之弱因麾衆而進毅等從之大破玄軍

沈叔任為梓潼太守戍涪城東軍既反二郡強宗侯勵  
羅與聚衆作亂四面雲合遂至萬餘人攻城甚急叔任

東兵不滿五百推布腹心衆莫不為用出擊大破之逆黨皆平

梁馬仙琕仕宋為龍驤將軍汝南陰譙二郡太守會壽陽陷魏將王肅侵邊仙琕力戰以寡尅衆魏人甚憚之韋放為明威將軍會領軍曹仲宗攻渦陽魏大將軍費穆帥衆奄至放軍營未立麾下止有二百餘人放免胄下馬據胡牀處分士卒皆殊死戰莫不一當百

杜懷瑤為梁秦二州刺史魏軍圍南鄭懷瑤第三子齊

力絕人便馬善射同心敢死士一百七十人每出殺傷數百人敵人憚之號為杜彪位至西荊州刺史

陳蕭摩訶為譙州刺史周武帝遣將宇文欣將精騎數千爭呂梁摩訶領十二騎深入周軍縱橫奮擊

後魏庾岳為安遠將軍常以少擊多士衆服其智勇

後周竇熾初仕後魏為衛將軍河橋之戰諸將退走熾時獨從兩騎為敵人所追至邛山熾乃下馬背山抗之俄而敵衆漸多三面攻圍矢下如雨熾騎士所執弓並

為敵人所射破熾乃總收其箭以射之所中人馬皆應  
弦而倒敵以殺傷既多乃相謂曰得此人未足為功乃  
稍引退熾因其怠遂突圍得出

李弼為秦州刺史從太祖平弘農與齊神武戰于沙苑  
左將軍為敵所乘弼將六十騎身先士卒橫截之賊分  
為二遂大破之

柳檜為平東將軍河湟郡守吐谷渾入寇郡境時檜兵  
少人懷憂懼檜撫而勉之衆心乃安因率數十人先擊

之渾人潰亂餘衆乘之遂大敗而走

權景宣為大都督豫州刺史鎮樂口東魏亦遣張伯德為刺史伯德令其將劉貴平率其戍卒及山蠻屢來攻逼景宣兵不滿千人隨機奮擊前後擒斬三千餘級貴平乃退走

宇文貴為右衛將軍時東魏潁川長史賀若統以潁川來降東魏遣將堯雄趙育是云寶

姓是云名寶

率衆二萬攻

潁川貴自雒陽率步騎二千救之東魏行臺任祥又率

衆四萬攻潁川方與雄合諸將咸以彼衆我寡不可爭  
鋒貴曰兵機倚伏固不可以常理論古人能以寡制衆  
者皆由豫覩成敗決必然之策耳吾雖闇於成事進與  
賀若合勢為計之上者遂入潁川雄等乃前貴率千人  
背城為陣與雄合戰大破雄育於陣降俘萬人貴乘勝  
逼任祥祥大敗是雲寶亦降

魏玄為驃騎大將軍陝州總管尉遲綱遣玄率儀同宇  
文能趙乾等步騎五百於鹿盧交南邀擊東魏雒州刺

史獨孤永業有衆二千餘人玄輕將五騎行前覘之卒  
與之遇便即交戰殺數十人獲馬并甲稍等永業遂退  
隋周羅睺為幽州刺史開皇末突厥達頭可汗犯塞從  
楊素擊之虜衆甚盛羅睺白素曰賊陣未整請擊之素  
許焉與輕勇二十騎直衝虜陣從申至酉短兵屢接大  
破之進位大將軍

王仁恭為光祿大夫領馬邑太守始畢可汗率騎數萬  
來寇馬邑復令二特勒將兵南過時兵不滿三千仁恭



率精銳逆擊破之其二特勒兵潰仁恭縱兵乘之斬獲千級斬二特勒

唐王君廓為上柱國武德初統兵經畧東都王世充將郭士衡許羅漢前後入掠廓轉擊退之拜右武衛將軍詔勞之曰卿以十三人破賊一萬自古以少制衆未之前聞非惟驍勇絕人亦足以顯卿忠節也

程知節為秦王府護軍武德三年以百餘騎擊王世充賊數千人破之

馬三寶為太子監門率領平道將軍突厥之寇渭川也  
三寶以數百騎卒與之遇接戰敗之

段德操為左武衛將軍領延州道行軍總管以鎮北庭  
梁師都與突厥之衆數千騎來寇延州安營于野猪嶺  
德操以衆寡不敵按甲以挫其銳後伺賊稍怠遣副總  
管梁禮率衆擊之德操以輕騎出其不意賊與禮酣戰  
久之德操多張旗幟掩至其賊大潰逐北二百餘里尅  
其魏州虜男女二千餘口經數月師都又以步騎五千

來寇德操擊之俘斬畧盡師都與百餘騎而遁

黑齒常之為左武衛大將軍仍檢校左羽林軍垂拱二  
年突厥犯邊命常之率兵拒之躡至兩井忽逢賊三千  
餘衆常之見賊徒爭下馬著甲遂領二百餘騎身當先  
鋒直衝賊遂棄甲而散俄頃賊衆大至及日將暮常之  
令伐木營中燃火狀如烽燧時東南忽有大風起賊疑  
有救兵相應遂狼狽夜遁以功封為燕國公

馬璘為安西裨校從副元帥李光弼攻史朝義於維陽

朝義自領精卒拒王師於北邙營壘如山旌甲耀日諸將愕詒不敢動璘獨率所部橫戈而出入賊陣者數四賊因披靡潰敗李光弼壯之曰吾用兵三十年未見以少擊衆有雄捷如馬將軍者

衛伯玉為神策將軍乾元二年十一月逆賊史思明遣魏將李歸仁鐵騎五千將犯陝州伯玉以數百騎擊破之於疆子坂積屍滿野虜馬六百疋歸仁與其黨東走陳洎為鎮靜軍使劍南節度使韋皋遣洎等進兵攻吐

蕃維州北蕃遣內大相論莽熱率雜虜十萬而來蜀師  
萬人據險設伏以行先出千人挑戰莽熱見我師之少  
悉衆追之發伏掩擊生擒論莽熱虜衆十萬殲夷者半  
梁牛存節初為宣武軍小將討河北存節前鋒下黎陽  
收臨河至內黃西以兵千餘人當魏人萬二千衆大破  
其陣殭仆蔽野太祖深所歎激謂有神兵之助

郭言從太祖赴汴為裨校屢將兵與蔡賊秦宗權戰于  
後郊每以少擊衆出必勝歸太祖嘉其勇果謂賓佐曰

言乃吾之虎侯也

晉郭海金為護聖都指揮使領黃州刺史天福二年襄  
州安從進謀犯闕海金為行營先鋒都指揮使與李建  
崇等同於唐州湖陽遇從進軍萬餘人海金以一旅之  
衆突擊大敗之策勲授檢校太保商州刺史

冊府元龜卷四百十九

欽定四庫全書

冊府元龜卷四百二十 宋 王欽若等 撰

將帥部

掩襲

古之用人也謀於廟宜於社推轂以命將秉旄而誓衆  
鳴鼓以啓行尅日以告戰是謂節制之師仁義之舉也  
及乎狙詐云盛智巧相圖故老氏言乎用奇孫子謂之  
詭道乃有人銜枚馬纏勒夜行晝伏掩其不備之事興

焉春秋以來司戎重者或斷之以深謀濟之以銳氣鋒  
鏑靡接俘馘坐獲誠決勝之奇策走敵之良術也與夫  
戎容暨暨所以宣武威天陣堂堂所以襲姦逆不鼓不  
成列臨大事而不忘大禮古人以為文王之戰者殊哉  
公子橐師楚大夫也魯成公十七年舒庸人以楚師之  
敗也敗於鄢陵舒庸東夷國道吳人圍巢伐駕圍釐巢駕釐乃楚四邑  
遂恃吳而不設備公子橐師襲舒庸滅之

叔弓魯大夫也昭公五年夏莒夷以牟婁及防茲來



奔

城陽平昌縣西南有防亭姑幕縣東北有茲亭

秋七月公至自晉莒人來討

討受牟夷

不設備戊辰叔弓敗諸蚡泉莒未陳也

荀吳晉大夫也魯昭公十三年鮮虞人聞晉師之悉起

也

五年傳曰遺守四千今甲車四千乘故為悉起

而不警邊且不修備

言夷狄無謀

荀吳自著雍以上軍侵鮮虞及中人驅衝兢

中山望都縣西北有

中人城驅衝車與狄爭逐

大獲而歸

左司馬敗楚大夫也魯哀公四年夏楚人既克夷虎

夷虎

蠻夷叛楚者

乃謀北方敗及申公壽餘葉公諸梁致蔡於負



食其已說下齊信欲止蒯通說令擊齊信然其計遂渡  
河襲歷下軍至臨淄齊王走高密

後漢岑彭為廷尉行大將軍事彭鎮河內馮異先攻朱  
鮪於雒陽鮪大出軍欲擊彭時天霧鮪以為彭已去令  
其兵皆獲黍彭乃進擊大破之

來歙為中郎將時隗囂據隴右歙與征虜將軍祭遵襲  
畧陽遵道病還遣精兵隨歙合二千餘人伐山開道從  
番須回中

番須回中  
並地名

徑至畧陽斬囂守將金梁因保其

城囂大驚曰何其神也

王霸為偏將軍光武幸譙使霸與捕虜將軍馬武東討周建於垂惠蘇茂將五校兵四千餘人救建武為茂建所敗霸閉營堅壁軍吏皆爭之霸曰今閉營固守示不相援賊必乘勝輕進捕虜無救其戰自倍如此茂眾疲勞吾承其弊乃可克也茂建果悉出攻武合戰良久霸軍中壯士路潤等數十人斷髮請戰霸知士心銳乃開營後出精騎襲其背茂建前後受敵驚亂敗走

鄧訓為張掖太守時盧水胡反叛訓因發湟中秦胡羌  
兵四千人出塞掩擊迷唐於寫谷斬首六百餘人得牛  
馬羊萬餘頭迷唐乃去大小榆兩谷名居頗巖谷衆悉破  
散其春復欲歸故地就田業訓乃發湟中六千人令長  
史任尚將之縫革為船置於箄上以渡河箄木筏也音步佳切掩  
擊迷唐盧落大豪多所斬獲

馬援為隴西太守援與揚武將軍馬成擊先零諸羌因  
將其妻子輜重移阻於允吾谷中援乃潛行間道兵聚

北山上援陣軍向山而分遣數百騎繞襲其後乘夜放  
火擊鼓叫譟虜遂大潰

魏滿寵為征東將軍青龍三年春吳主遣兵數千家佃  
於江北至八月寵以為田向收熟男女布野其屯衛兵  
去城遠者數百里可掩擊也遣長史督二軍循江東下  
摧破諸屯焚燒穀物而還詔美之因以所獲盡為將士  
賞

鄧艾為鎮西將軍伐蜀蜀將姜維守劍閣鍾會攻維未

能克艾上言今賊摧折宜遂乘之從陰平繇邪徑經漢德陽亭趣涪出劔閣四百里去成都三百餘里奇兵衝其腹心劔閣之守必還赴涪則會方軌而進劔閣之兵不還則應涪之兵寡矣軍志有之曰攻其無備出其不意今掩其空虛破之必矣冬十月艾自陰平道行無入之地七百餘里鑿山通道造作橋閣山高谷深至為艱險又糧運將匱瀕於危殆艾以擅自褻推轉而下將士皆攀木緣崖魚貫而進先登至江由蜀守將馬邈降蜀

衛將軍諸葛瞻自涪還綿竹列陳待艾艾遣子慧唐亭侯忠等出其右司馬師纂等出其左忠纂戰不利並退還曰賊未可擊艾怒曰存亡之分在此一舉何不可之有乃叱忠纂等將斬之纂馳還更戰大破之斬瞻及尚書張遵等首進到雒後主遣使奉皇帝璽綬為笈詣艾請降

胡烈為泰山太守司馬文王為大將軍甘露二年討諸葛誕於淮南吳將朱異帥兵萬餘人留輜重於都陸輕



兵至黎漿監軍石苞兗州刺史陳泰禦之異退烈以奇  
兵襲破都陸焚其糧運苞泰復進擊異大破之異之餘  
卒餒甚食葛葉而遁

吳呂蒙為左護軍虎威將軍西屯陸口與關侯結好侯  
討樊留兵將備公安南郡蒙上疏曰雲長討樊而多留備  
兵必恐蒙圖其後故也蒙嘗有病乞分士衆還建業以  
治病為名彼聞之必撤備兵而赴襄陽大軍浮江晝夜  
馳上襲其空虛則南郡可下而彼可擒也遂稱病篤大

帝乃露檄召蒙還陰與圖計侯果信之撤備兵以赴樊  
魏使于禁救樊侯盡擒禁等人馬數萬託以糧乏擅取  
湘關米帝聞之遂行先遣蒙在前蒙至尋陽盡伏精兵  
兵艍艍中使白衣搖櫓作商賈人服晝夜兼行至侯所  
置江邊屯候盡收縛之是故侯不聞知遂到南郡士仁  
麋芳皆降

陸遜為鎮西將軍嘉禾五年攻襄陽還到白圍託言住  
獵潛遣將軍周峻張梁等擊江夏新市安陸石陽石陽

市盛峻等奄至人皆捐物入城城門噎不得闕敵乃自斫殺已民然後得闕斬首凡千餘人

孫韶為鎮北將軍黃武四年魏文帝至廣陵臨江觀兵帝見波濤洶湧歎曰嗟乎固天所以隔南北也遂歸韶乃遣將高壽等率敢死之士五百人於徑路夜要之帝大驚壽等獲副車羽蓋以還

朱然為車騎將軍右護軍赤烏九年征柤中魏將李興等聞然深入率步騎六千斷然後道然後出逆之軍以

勝反

朱異為偏將軍時魏廬江太守文欽營住六安多設屯  
砦置諸道要以招誘亡叛為邊寇害異身率其部下二  
千人掩破欽七屯斬首數百遷揚武將軍

胡綜為右都督時將軍晉宗叛歸魏以宗為斬春太  
守去江數百里數為寇害大帝使綜與賀齊輕行掩襲  
生虜得宗加建武中郎將

晉祖逖為豫州刺史陳川遣將魏碩掠豫州郡大獲子

女車馬逃遣將軍衛策邀擊於谷水盡獲所掠者皆令歸本家

朱伺為威遠將軍依陶侃於夏口建興中陳聲率諸無賴二千餘家斷江抄掠侃遣為都護討聲聲衆雖少伺容之不擊求遣弟詣侃降伺外許之及聲去伺乃遣勁勇要聲弟斬之潛軍襲聲聲正旦並出祭祀飲食伺軍入其門方覺聲將闕普鄭進皆死戰伺軍人多傷乃還營聲東走保董城

宋王鎮惡為振武將軍率龍驤將軍蒯思討劉毅晝夜兼行於鵲州尋陽江口巴陵守風凡四日十月二十二日至豫章口去江陵城二十里鎮惡進路揚聲劉兖州上毅謂為信然不知見襲鎮惡自豫章口捨船步上蒯恩軍在前鎮惡次之舸留一二人對舸岸上豎立七旗下輒安一鼓語所留人計我將至城便長嚴如後有大軍狀又分隊在後令燒江津船艦鎮惡徑前襲城語前軍若有問者但云劉兖州至津戍及百姓皆言劉蕃實

上晏然不疑未至城五六里逢毅要將朱顯之與十許  
騎步從者數十欲出江津問是何人答云劉兖州至顯  
之馳前問蕃在所答云在後顯之既見軍不見蕃而見  
軍人擔鼓排戰具望見江津船艦已被燒烟焰漲天而鼓  
聲之聲甚盛知非蕃上便躍馬馳告劉毅外有大軍似  
從下上垂已至城江津船悉被火燒矣行令閉諸城門  
鎮惡亦馳進軍人緣城得入門猶未及下關因得開大  
城東門大城內毅凡有八隊帶甲千餘人已得戒嚴蒞

恩入東門便北迴擊射堂前攻金城東門鎮惡入東門  
便直擊金城西門軍分攻金城內東從舊將猶有六隊  
千餘人西將及能細直吏快手復有二千餘人食時就  
攻至中晡西人退散及歸降略盡鎮惡入城便因風放  
火燒大城南門及東門又遣人以詔及赦文并高祖手  
書凡三函示毅毅皆燒不視金城內亦未信高祖自來  
有王桓者家在江陵昔手斬桓謙為高祖所賞拔常在  
左右求還西迎家至是率十餘人助鎮惡戰下晡間於



金城東門北三十步鑿城作一穴桓便先衆入穴鎮惡  
自後繼之隨者稍多因短兵接戰鎮惡軍人與毅將或  
有是父兄子弟中表親戚者鎮惡令且鬪且共語衆並  
知高祖自來人情離懈一更許廳事前陣散潰斬毅勇  
將趙蔡毅左右兵猶閉東西閣拒戰鎮惡慮闇夜自相傷  
犯乃引軍出繞金城開其南面以為退路毅慮南面有  
伏兵三更中率左右三百許人開北門突出初毅常所  
乘馬在城外不得入倉卒無馬毅便就子肅民取馬肅

民不與朱顯之謂曰人取汝父而惜馬不與汝今自走  
欲何之奪馬以授毅初出正值鎮惡軍衝之不得去迴  
衝蒯恩軍軍人鬪已一日疲倦毅得從大城東門出奔  
牛牧佛寺自縊死鎮惡身被五箭射鎮惡手所執稍於  
手中破折江陵平後二十日大軍方至署中兵出為安  
遠護軍武陵內史以討劉毅功封漢壽縣子食邑五百  
戶

沈林子參高祖征西軍事署三府中兵前鋒與叅軍檀

道濟同攻潼關姚紹退走留將軍姚鸞精兵守險林子  
銜枚夜襲即屠其城剽鸞而抗其衆高祖賜書曰頻再  
破賊慶快無譬暨屢摧破想不復久耳

馮景祖為晉熙王燮中兵參軍燮為郢州刺史元徽二  
年太尉江州刺史桂陽王休範舉兵逼朝廷燮遣景祖  
襲尋陽休範留中兵參軍毛慧連州別駕程罕之居守開  
門詣景祖降進燮號安西將軍加督江州諸軍事

南齊陳顯達為益州刺史武帝即位進號鎮西益部山

險多不賓服大度村獠前後刺史不能制顯達遣使責其租贍獠帥曰兩眼刺史尚不敢調我遂殺其使顯達分部將吏聲言出獵夜往襲之男女無少長皆斬此後山夷震服

劉懷珍宋世為寧朔將軍東莞二郡太守率龍驤將軍王敬則姜產步騎五千討壽陽廬江太守王仲子南奔賊遣偽廬江太守劉道蔚五千人頓建武澗築三城懷珍遣軍主段僧愛等馬步三百餘人掩襲斬之引

軍至晉熙偽太守閻湛拒守劉子勛遣將王仲蚪步卒  
萬人救之懷珍遣馬步三千人襲擊仲蚪大破之於莫  
耶山遂進壽陽

李安民為鎮東將軍屯壽春後魏南侵詔安民持節屢  
行緣淮清泗諸戍屯軍安民引水步軍入清至淮陽與  
魏戰破之既退安民知有伏兵乃遣族弟馬軍主長文  
三百騎為前驅自與軍副周盤龍崔文仲係其後分軍  
隱林中及長文至宿豫魏軍見眾少數千騎遮之長文

且退且戰引賊向大軍安民率盤龍等趨兵至合戰於孫溪渚戰交灣側魏軍大敗赴清水死不可勝數

陳侯安都初為梁將太平元年屯梁山以輕兵襲齊行臺司恭於歷陽大破之俘斬萬計後隨高祖鎮京口除蘭陵太守高祖謀襲王僧辯諸將莫知者惟與安都定計仍使安都率水軍自京口趨石頭高祖自率馬步從江乘羅落會之安都至石頭北棄舟登岸僧辯弗之覺也石頭城北接嶺阜雉堞不甚危峻安都被甲帶長刀

軍人捧之投於女垣內衆隨而入進逼僧辯臥室高祖  
大軍亦至與僧辯戰於廳事前安都自內閣出腹背擊  
之遂擒僧辯

程文季為豫章內史隨都督章昭達率軍往荊州征蕭  
歸歸與周軍多造舟艦置于清泥水中時水長漂疾昭  
達乃遣文季共錢道戢輕舟襲之盡焚其舟艦昭達因  
蕭歸等兵稍怠又遣文季夜入其外城殺傷甚衆

陳詳為仁威將軍吳州刺史天嘉二年周迪據臨川舉

兵反詳等從他道襲迪於濡城別營獲其妻子迪敗走  
詳復本鎮

陸子隆為智武將軍時華皎據湘州反以子隆居其心  
腹深患之頻遣使招誘子隆不從皎因遣兵攻之又  
不能克及皎敗於郢州子隆出兵以襲其後因與王師相  
會授持節通直散騎常侍都督武州諸軍進爵為侯增  
邑并前七百戶

魯廣達為智武將軍巴州刺史太建初與儀同章昭達



入峽口拓定安蜀等州鎮時周氏將圍江左大造舟艦於蜀并運糧青泥廣達與錢道戢等兵掩襲縱火焚之以功增封并前二千戶仍還本鎮

後魏晉王伏羅太武之子督高平原州諸軍討吐谷渾慕利延軍至樂都謂諸將曰若從大道恐軍聲先振必當遠遁若潛軍出其非意此鄧艾擒蜀之計也諸將咸難之伏羅曰夫將軍制勝萬里擇利專之可也遂間道行至大母橋利延衆驚奔白蘭慕利延兄子拾寅走河

曲降其一萬餘落

陸俟為內都大官長安盧永劉超等聚黨以叛太武詔俟鎮長安使以方畧定之於是俟單馬之鎮超聞之忻然以為無能為也既至申揚威信示以成敗誘納超女外若姻親超猶自警初無降意俟乃率其帳下往見超觀其舉動超使人迎曰三百人以外適當以弓馬相待三百人以內當以酒食相供乃將二百騎詣超超設備甚嚴俟遂縱酒盡醉而退俟謂將士曰超可取乃密選

精兵五百人激勵之言至懇切士卒各曰以死從公必無二也遂偽獵詣超與士卒約曰今會發機以當醉為限俟於是詐醉上馬大呼手斬超首將士皆應聲縱擊遂平之太武大悅徵還轉外都大官

蕭寶寅為鎮東將軍討梁梁浮山既成堰淮水濫溢將為揚徐之患寅於堰上流更鑿新渠引注淮澤水乃小滅乃遣輕車將軍劉智文虎威將軍劉延宗率壯士千餘夜渡淮燒其竹木營聚破賊三壘殺獲數千人斬其

將軍王升明而還火數日不滅

鄜範為寧遠將軍副慕容白曜南征宋師次無鹽宋將  
中纂憑城拒守議者僉以攻具未周不宜便進範曰今  
輕軍遠襲深入敵境無宜淹留久稽機候且纂必以我  
軍來速不在攻守謂方城可憑弱卒可恃今若外潛威  
形內整戎旅密勵將士出其不意可一攻而尅之白曜  
遂潛軍偽退示以不攻纂果不設備於是即夜部分晨  
便騰城崇朝而尅

于栗磾為黑稍將軍新安侯太武征赫連昌勅栗磾與  
宋兵將交侯周幾襲陝城昌弘農太守曹達不戰而走  
乘勝長驅仍至三輔進爵為公加安南將軍

北齊潘樂為司徒文宣時周文帝東至崤陝遣其行臺  
侯莫陳崇從齊子嶺趣軹關儀同楊標從鼓鐘道出建  
州陷孤公戍詔樂總大衆禦之樂晝夜兼行至長子遣  
儀同韓永興從建州西趣崇崇遂遁

後周賀拔岳為衛將軍副爾朱天光討万俟醜奴醜奴

走安定平亭天光與岳軍於汧渭之間宣言遠近曰今  
氣候漸熱非征討之時待至秋涼更圖進取醜奴聞之  
遂以為實分遣諸軍散營農於岐州之北岳與天光諸  
軍盡發掩之醜奴乃棄平亭而走岳輕騎急追明日及  
醜奴於平涼之長坑一戰擒之

劉亮為大都督從文帝平侯莫陳悅悅黨幽州刺史孫  
定兒據州不下涇秦諸州悉與相應衆至數萬推定兒  
為王帝令亮襲之定兒以義兵猶遠未為之備亮輕以

二十騎先樹一纛懸於近城高嶺即馳入城中定兒方  
置酒高會卒見亮衆皆駭愕莫知所為亮乃麾兵斬定  
兒懸首號令賊黨仍遙指城外纛命二騎曰出追大軍  
賊黨大懼一時降附於是諸州皆歸款伏

裴寬為車騎大將軍鎮弘城時北齊伊川郡守梁鮪常  
在境首抄掠文帝患之命寬經畧焉後鮪行過妻家椎  
牛宴飲既醉然後不復自防寬密知之遣兵往襲遂斬  
之帝嘉焉賜奴婢金帶粟帛等

李遠為都督義州弘農等二十一防諸軍事時東魏將段孝先率步騎二萬趨宜陽以送糧為名然實有窺窬之意遠密知其計追兵襲破之獲其輜重器械孝先遁走文帝乃賜所乘馬及金帶牀帳衣被等并雜綵二千疋拜大將軍

史寧為驃騎大將軍宕昌羌獠甘作亂逐其王彌定而自立朝廷遣寧討破之獠甘將百騎走投生羌鞏廉王彌定遂得復位寧以未獲獠甘密欲圖之乃揚聲欲還



獠甘聞之復招引叛羌依山起柵欲攻彌定寧謂諸將曰此羌入吾術中當進兵擒之耳諸將思歸咸曰羌之聚散無常依據山谷今若遣討恐引日無成且彌定還得守蕃將軍功已立矣獠甘勢弱彌定足能制之以此還師策之上者寧曰一日縱敵數世之患豈可舍垂滅之寇更煩再舉人臣之禮知無不為以此觀諸君不足與計事也如更沮衆寧豈不能斬諸君邪遂進軍獠甘衆亦至與敵大破之生擒獠甘徇而斬之并執鞏廉玉

送闕

獨孤信為岷州刺史赤水蕃王梁企定舉兵反詔信討之企定尋為其部下所殺而企定子弟收其餘衆信乃勒兵向萬年頓三交谷中賊併力拒守信因詭道趣稠松嶺賊不虞信兵之至望風奔潰乘勝逐北徑至城下賊並出降

隋楊素為信州總管及大舉伐陳以素為行軍元帥引舟師趣三破軍至流頭灘陳將戚欣以青龍百餘艘屯

兵數千人守狼尾灘以遏軍路其地險峭諸將患之素  
曰勝負大計在此一舉若晝日下船彼則見我灘流迅  
激制不繇人則吾失其便以夜掩之素親率黃龍數千  
艘銜枚而下遣開府王長襲引步卒從南岸擊欣別柵  
令大將軍劉仁恩率甲騎趣白沙北岸遲大昭切明而至  
擊之欣大敗走悉虜其衆勞之秋毫不犯陳人大悅  
李安為黃門侍郎平陳之役為楊素司馬仍領行軍總  
管率蜀兵順流東下時陳人屯白沙安謂諸將曰水戰

非北人所長今陳人依險泊船必輕我而無備以夜襲之賊可破也諸將以為然安帥先鋒大破陳師高祖嘉之詔書曰陳賊之意自言水戰為險隘益之間彌謂官軍所憚幕府親將所部夜動舟師摧隘破賊徒生擒虜衆益官軍之氣破賊人之膽副朕所委聞以欣然進位上大將軍除郢州刺史

周法尚為桂州總管桂州人李光仕舉兵作亂令法尚討之光仕帥勁兵保白石洞法尚遣兵列陣以當光仕

親率奇兵蔽林設伏兩陣始交法尚馳擊其柵柵中人皆走散光仕大潰追斬之後遂州獠反又命法尚以行軍總管討之軍將至賊散走山谷間法尚捕不能得於是遣使慰諭假以官號偽班師日行二十里軍再舍潛遣人覘之知其首領盡歸柵聚相賀法尚遣步騎數千擊襲破之

李充為行軍總管從元帥衛王爽擊突厥言於爽曰突厥每侵邊諸將輒以全軍為討莫能死戰繇是突厥勝

多敗少所以每輕中國之師今者沙鉢畧悉國內之衆屯據要險必輕我而無備精兵襲之可破也爽從之諸將多以為疑惟李徹獎成其計請與同行遂與充率精騎五千出其不意掩擊大破之沙鉢畧棄所服金甲潛草中而遁

楊武通歷岷蘭二州總管與周法尚討嘉州叛獠法尚軍初不利武通為賊斷歸路於是束馬懸車出賊不意頻戰破之

唐劉文靜初為唐公府司馬率兵禦屈突通於潼關通遣虎牙郎將桑顯和率勁兵來擊文靜苦戰者半日死者數千人文靜度顯和軍稍怠潛遣奇兵掩其衆通尚擁兵數萬將遣歸東都文靜遣所部將追而執之畧定新安以西之地

李靖字藥師武德二年為開府時蕭銑據荊州高祖遣靖安輯之會開州首領冉肇則反招集蠻左凶威甚盛趙郡王孝恭與戰不利靖率羸兵八百襲之破其城後

又要險設伏大破賊軍貞觀三年以靖為代州道行軍總領四年擊定襄大破之頡利可汗大懼退保鐵山遣使入朝謝罪請舉國內附又以靖為定襄道行軍總管往迎頡利頡利雖外請朝謁而潛懷猶豫其年二月太宗遣鴻臚卿唐儉將軍安修仁慰諭靖揣知其意謂副將張公謹曰詔使到彼彼必自寬遂選精騎一萬齎二十日糧引兵自白道襲之公謹曰詔許其降行人在彼未宜討擊靖曰此兵機也時不可失韓信所以破齊也



如唐儉等輩安足可惜督軍疾進師至陰山遇其斤堠  
千餘帳皆俘以隨軍頡利見使者大悅不虞官兵至也  
靖軍將逼其牙十五里彼始覺頡利畏威先走部衆因  
而潰散靖斬萬餘級俘男女十餘萬殺其妻隋義城公  
主初頡利乘千里馬將走投吐谷渾西道行軍總管張  
寶相擒之以獻俄而突利可汗來奔遂復定襄常安之  
地斤土界自陰山

張孝岷為偏將軍武德二年閏二月以勁卒百人襲王

世充汜水城入其郭郭沉其米船一百五十艘

劉弘基為行軍總管武德二年七月遣仲如願襲王世充於河陽城斬首數百級毀其河橋而還

李厚德為涉州刺史武德三年七月襲武昌克之獲王世充總管韋瑗

王君廓為左將軍時王世充鄭州司馬沈悅遣使詣左武大將軍李世勣請以城降君廓夜襲虎牢悅為內應遂克之獲其荆王行本長史戴胄武德四年四月襲竇

建德糧艘大破之斬首三百級五月又襲破之獲其將  
張特虜六百餘人斬首三百級

江夏王道宗與侯君集副李靖為崑丘道行軍大總管  
以討吐谷渾時賊聞兵至走入嶂山已行數千里諸將  
議欲息兵道宗固請追討李靖然之而君集不從道宗  
遂率偏師倍道徑往去大軍十日追擊之賊據險苦戰  
道宗潛遣千餘騎踰山襲其後表裏受敵一時奔潰

張亮為滄海道行軍大總管從太宗征高麗與亞將程

名振拔卑沙城其城四面懸絕惟西門有攻取之勢名振督軍夜襲之副總管王文度先登士卒繼進城中潰散虜其男女八千口

牛進達貞觀中為鄴善行軍副總管後吐蕃入寇進達鎮於松州吐蕃攻城十餘日進達掩其不備夜出兵襲破之吐蕃乃退

蘇定方貞觀初為康道府折衝隨李靖襲突厥頡利於磧口靖遣定方率二百騎為前鋒乘霧而行走去賊一

里許忽然霧歇望見其牙帳馳掩殺數十百人頡利及隋公主狼狽散走餘衆俯伏靖軍既至遂悉降之高祖時為左驍騎大將軍既平賀魯思結闕侯斤都曼分鎮其地以彌射步真不綏御之遂率疎勒未俱般陁三國復叛擊破于闐定方受詔討之兵至葉水而賊保馬頭川於是選精兵萬人騎三千掩襲之一日一夜行三百里詰朝而到其城都曼大驚拒戰於城門之外賊師敗績

契苾何力貞觀中為左領軍將軍與薛萬均征吐谷渾萬均為賊所攻何力救之獲吐谷渾主在突倫川何力復欲擊之萬均懲其前敗固言不可何力曰賊非有城郭逐草木以為生若不襲其不虞便恐鳥驚魚散一失機會安可傾其巢穴邪乃自領驍兵千餘騎直入突倫川襲破吐谷渾牙帳斬首數千級獲駝馬牛羊四十餘萬頭渾主脫身以免俘其妻子而還龍朔初何力為遼東道行軍大總管率兵征遼次于鴨綠水其地即高麗

之險防莫離支男生以精兵數萬守之衆莫能濟何力  
始至會層冰大合趣即渡水兵鼓噪而進賊遂大潰追  
奔數十里斬首三萬級餘衆盡降男生僅以身免會有  
詔班師乃還

黑齒常之為河源軍副使吐蕃贊婆及素和貴等率衆  
數萬屯聚於良非川常之以精騎三千夜襲賊營斬首  
二千餘級獲羊馬數萬計贊婆等單馬而遁賞帛三千  
段以為河源軍大使

張仁愿為雒州刺史時突厥入寇朔方軍總管沙叱忠義為賊所敗仁愿攝御史大夫代忠義統衆仁愿軍至而賊衆已退乃躡其後夜掩大破之

崔光遠為御史大夫兼京兆尹天寶末祿山陷西京光遠於渭北召集人吏之歸順者嘗有賊剽掠涇陽縣界于僧寺中椎牛享之連夜酣飲去光遠營四十里光遠悉而知之率馬步二千人往一夜及之賊徒多醉不以為虞光遠領百餘騎持滿搃其要路分驍勇以陌刀呼



而斬之賊徒二千餘人皆斃虜其馬千餘足賊中以光  
遠勇勁常避其鋒

侯希逸為平盧軍節度使肅宗元年建丑月率眾襲范  
陽擊敗偽將李懷光引眾而南

李重倩善騎射臨事勇果為淮西節度李忠臣偏裨忠  
臣討李靈耀於汴州時田承嗣遣侄悅率精兵數萬援  
靈耀屯於州郭威聲頗盛重倩以騎數百乘夜掩襲貫  
穿賊營殺數千人而旋賊軍大駭田悅單騎突走士卒

相枕藉死者不可勝紀靈耀因是開城潛遁餘卒奔潰  
遲明汴州平皆重倩之力也

田穎為忠武軍大將軍從李光顏討淮西時諸軍使齊  
力攻討賊嘗徑攻烏重胤之壘重鎗禦之中數槍馳請  
救於光顏光顏以小殷橋賊之保也乘其無備使穎及  
宋朝隱襲而取之遂平其城壘

梁雷彥恭為朗州節度使時周洎在荆南暴狠與鄰境  
皆樹讐怨蜀淮賊圍迫杜洪於鄂州洪求救於洎洎乃

悉境內兵登舟從江而下彥恭常有窺圖意聞汭東去  
喜甚即率兵上襲荆人拱手而歸之於是廩藏金帛市  
里人民悉為彥恭舟徙而去

後唐李嗣恩天祐十二年為天雄軍馬步軍都指揮使  
梁將劉鄩之北趣樂平也嗣恩襲之倍程先入北京時  
城中無備得嗣恩兵至人百其勇鄩聞其先過雨中宵  
遁

晉康福拜朔方河西等軍節度使唐明宗遣將軍牛和柔

領兵送赴鎮行次青岡峽會大雪令人登山望之見川  
下烟火吐蕃數千帳在焉寇不之覺因分軍為三道以  
掩之蕃衆大駭棄帳幙而走殺之殆盡獲玉璞羊馬甚  
多

周馮暉善戰有勇後唐明宗朝領瀘州刺史典禁兵長  
興初董璋據東蜀叛攻陷閬州其年秋晉祖將兵繇大  
散關討之川賊守劍門暉與趙在禮各領部下兵踰險  
阻他道出於劍門之左掩襲之殺守兵殆盡

折從阮為勝州觀察處置等使廣順三年三月率軍  
至落葉鎮掩襲蕃部尋却至慶州折德宸為府州團練  
使廣順三年十二月太原賊將喬贊引兵犯州界尋出  
軍掩襲敗走之

冊府元龜卷四百二十